

吳  
中  
人  
物  
志

張景春吳中人物志序

昔魏劉邵撰人物志由性原以導蕭疏而材理晰焉至宋義慶因著世說而品類加詳蓋含靈代間嶽峻降神杜鳴表瑞泛採百城僻搜十室罔或云乏矧吳之巨麗乎然國史不詳郡乘亦畧于是乎始求之野矣張隱君者抱逸民之雅致晞良賈之深歲葺西園以屏居傲東都以著論人稱曰

西園公云博綜前史旁詢今獻上自成周  
下迄我

明歲以千數代經屢革有聞必書為類十  
有三為卷十有二共得若干人題曰吳中  
人物志展卷之餘悅若神對曠世相感實  
為美談夫自固曄叙列曾不數人子政之  
傳列仙玄晏之傳高士胡訥之錄孝行費  
樞之撰廉吏或纂名士於閩川或紀耆舊

於益部賢媛貞女惟述房中法羽神僧止  
輯方外奚若隱君考載之全乎近觀祝京  
兆之徃哲顧司寇之新編闡微揚陋茲為  
宗鏡矣又若計然著書端木習道隱君豈  
徒脩業而息之者乎是編也隱君之孫天  
台吏滂牧而蘊諸篋季孫沖之子太學生  
獻翼更為刪次系以論贊辭麗而作者之  
意益彰矣若靈運著述德之篇姚班廣紹

訓之志家風罔墜世業攸徵韓子亦曰莫  
為之後雖盛弗傳其斯之謂乎余既快觀  
爰識簡端 隆慶庚午孟冬朔

賜進士奉政大夫吏部司勳郎

勅僉雲南憲使郡人皇甫汴子循撰

吳中人物志卷之一

明長洲張景昇春浦館

曾孫駢麟論贊上

鳳翼燕翼校刻

孝友

漢

張武吳郡由拳人也父業郡門下掾送太守妻子還鄉里至河內亭盜夜劫之業與賊戰死遂亡失尸骸武時年幼不及識父後之太學受業每節常持父遺劍至亡處祭醊泣而還太守第五倫嘉其行舉孝廉

遭母喪過毀傷父魂靈不返因哀慟絕命

宋

顧悌字子通雍族人以孝悌廉正聞於鄉黨孫權時為將軍言辭切直朝廷憚之悌父向歷四縣令致仕每得父書灑掃設几筵舒書其上拜跪讀之父終飲漿不入口五日以不見父喪常畫壁作棺柩像設神座於下對之哭泣服未闋而卒

陳遺郡人宋初為郡吏母好食鑊底飯遺在後恒帶一囊每煮食輒剝其焦以貽母後孫恩亂聚得數斗恒以自隨及敗逃竄多有餓死遺因此得活母晝夜

泣涕自為失明耳無所聞遺還人戶再拜號咽母豁  
然即明

顧訓之仕宋太原太守五代同居子孫富盛闔門雍  
睦家有百口時人重之

顧昌衍郡人居喪幾至滅性王儉言之天子謂張永  
之甥授尚書庫部郎

張敷雍州都督邵子也性整貴好讀玄書燕屬文論  
父在吳興亡敷往奔赴自發都至成服凡十餘日始  
進水漿葬畢不食鹽菜遂毀瘠成疾未暮而卒孝武  
詔贈侍中



張暢字少微弟牧嘗為獒犬所傷醫云宜食蝦蟆牧甚難之暢含笑先嘗牧因此乃食創亦即愈暢與從兄敷演鏡齊名

張稷字公喬幼有孝性所生母劉無寵遘疾時稷年十一侍養衣不解帶每劇則終夜不寢及終毀瘠過人州里謂之淳孝長兄瑋善彈箏稷以劉氏先執此伎聞瑋為清調便悲感頓絕遂終身不聽之父永及嫡母丘相繼殂六年廬於墓側

齊

陸厥少有風槩永明九年州舉秀才父閑被誅厥坐

擊而方尋有赦厥恨父不及感慟而卒年二十八有文集十卷弟絳完襄絳當閑臨刑時抱頸求代不獲以身蔽刃行刑者併害之

梁

陸襄字師卿齊瑒州別駕閑子侯景圍臺城襄直侍中省城陷奔還吳義兵夜襲郡殺景僞太子蘇單于推襄行郡事襄與景將宋子偃戰於松江敗績憂憤卒年七十襄弱冠遭家禍釋服猶若居憂終身蔬食布衣不聽音樂五十餘年

陸景融蘇之吳人元方子為象先後母弟象先被笞

景融諫不入則自楚毋為損威人多其友

顧協晉司空和六世孫幼孤舉秀才為廷尉正清介  
有志操自丁艱憂終身布衣蔬食不復更娶卒無胤  
嗣無衾以歛武帝悼惜詔資給喪事

陳

張昭吳人幼至孝父煖病渴嗜鮮魚昭結網捕魚以  
供膳弟軋亦有至性父卒兄弟並不衣縣不食鹽酢  
日食升麥屑粥每感慟必嘔血

唐

歸登拾遺崇敬子事繼母篤孝舉孝廉又策賢良拜

給事中憲宗問政所先登勸順納諫諍內外傳以為  
謹言

龔景才字敦禮五世同居以孝義稱麟德九年旌表  
其門

丘為嘉興人事繼母孝嘗有靈芝生堂下累官太子  
右庶子時年八十餘而母無恙給俸祿之半及居憂  
觀察使韓滉以致仕官給祿所以惠養老臣不可在  
喪為異惟罷春秋羊酒初還鄉縣令謁之為候門磬  
折令坐乃拜里胥立庭下既出乃敢出經縣署降馬  
而趨年九十六

陸南金字季孫開元初少卿盧崇道抵罪徙嶺南逃還偽稱南金弔客突入其舍而道其情南金匿之俄事覺詔御史捕按南金當重法弟趙璧自言匿崇道者我也請死南金固言弟自誣不情御史怪之趙璧曰毋未葬妹未歸兄能辦之我生無益不如死御史驚上狀玄宗皆宥之南金知書史操履謹飭張說陸象先稱其賢由庫部員外郎以疾改太子洗馬卒丁公著字平子蘇州吳郡人祖衷父緒皆不仕公著生三歲喪所親七歲見鄰母抱其子哀感不食因請於父絕粒奉道真其幽贊父憫而從之年十七勉令

就學年二十一五經及第授集賢校書郎秩未終歸  
侍鄉里遇父喪躬負土成墳哀毀之容人為憂之里  
閭成風皆敦孝悌

宋

龔明之練川人性至孝幼事祖母李李年七十二病  
且革明之潛灼頂祝天願減已五齡以益李壽詰旦  
李病即愈果又五年而卒嘗數千里外護母弟二喪  
歸葬曾不以貧自阻年六十始應鄉貢或勸少匿其  
數嘆曰吾誰欺竟書其實晚以特恩廷試授高州文  
學年踰八十法不應仕吳士在朝者列其行義薦之

鄉人又請于朝超遷宣教卽致仕嘗撰中吳紀聞三卷卒年九十六

周容父伯乙母朱氏容早失恃事母至孝爲人所稱爲縣從事嘗有事于項山得數粟附婦以奉母妻匿之以他粟進他日母出之以食容容心疑焉遂詬譴其妻容卒邑人祀之

范純佑蘇郡人仲淹子性孝事父不違左右仲淹出鎮閩陝純佑與將卒錯處鈞深摘隱得其才否由是仲淹任人無失而屢有功後以蔭爲將作大匠弟純仁父沒始出仕

陳振字震亨襄之後也父遵出贅李衡女因家崑山  
遵死振幼貧無以葬得地圓明村卜者云不利長子  
振曰使親歲得寧或不宜於振二弟尚可主祭遂葬  
焉天性至孝以祿不逮養刻木為親像一飯必祭急  
義樂善好汲引後進有過失必規正之為文簡健高  
雅無宋季陋習

李鼇者壽昌令璩之子也璩濮州人咸平中自睦州  
罷官北歸舟過吳江而卒即葬于天平山鼇時尚幼  
奉母鄭家于蘇天聖中鄭卒與璩合葬鼇倚杖寢苦  
廬于墓側早夜悲慟甘露再降于松栢朝野名士皆



為賦詩醵又以母嘗誦金剛經刺血為書刻於墓下  
即中楊備表之

元

朱良吉支塘人延祐乙卯冬母錢病危剔胷肉煮粥  
以進母啜之而病愈良吉心痛不能起邑人聞而過  
其家觀其瘡僅五寸氣騰出為納其心以素白皮線  
縫之不逾月而愈

國朝

戴君用吳人父福洪武中因監稅失火法當死代父  
刑于闔門其妻吳氏守節旌表

楊玠字公蘊天性孝義永樂間入京師遇館人喪不能舉將鬻其子玠探囊中得鈔三十錠助之後婦母顧氏遘疾藥不能效玠籲天割股作羹以進母食之疾尋愈

顧亮字寅仲吳邑人五月而孤事母曲盡孝誠娶婦不能事姑母不言於亮亮潛知之遂出其妻單居旅泊者踰十年母沒如母存之日太守况伯律以為郡中之賢者無過若人逮書塾延之子犯薄刑况公欲寬之亮執不容宥堅請寘之於律

楊翥字仲舉少孤貧從兄戍武昌為鄉校師為人端

厚和裕事母及兄孝弟著聞

徐植字元秀常熟縣人父彥達掌鄉賦徂于元季獎政賦入後期法當刑植時年二十八赴所司自陳引為已罪所司不能奪遂從其請臨刑有詩曰父母恩同天地高願將一死報劬勞三杯白酒濃如鴆七尺青絲利似刀風送斷魂歸故里月移枯骨葬荒郊遙知親族偏憐我淚灑西風濕布袍邑子王廷珪為作孝子傳

錢迪甦之子少有至性洪武初父坐事當刑迪慨然詣闕求以身代上許之死時年甫十八甦得老而終

從子完感其孝為特祠於家

蔣安字仁伯洪武間其弟懋以累戍開平安時為邑諸生去巾幘詣御史泣曰懋幼弱不任戍且老母所鍾愛請以安往御史許之

張巽字公遜洪武間兄公讓坐事成貴州歿于戍所有司檄取戶丁補伍父命公豫往巽曰弟幼弱宜留以侍親且遠戍勤親之憂吾當往父不得已遣之鄉人皆予其義

居璠字永美常熟許浦人性淳朴自其四世未嘗析爨璠尤有義問

論曰烈士者以孝義為本文游為末孝弟者以致養為先榮觀為後漢世忠孝成俗乘軒服冕非此莫由宜永保其宗社長守其祿位也晉宋以來非出衣簪之下多發猷畝之中王公大人曾不與斯人之徒隸齒以此言聲教非卿大夫之恥乎有官非聞達而祿喜逮親有祿不及養而復不自堪有昆弟爭死而身全有夫婦俱喪而名立訓不奉于貽謀規不稟于聖善而篤于天性膝下之歡自足焉茂章嘉樹榮枯于庭宇走獸翔禽馴狎于墓廬村為孝教村里為和順里有不播徽烈于當年揚休名于千載者哉粵稽有

吳縱橫一千里上下五百年剔肝剗股比肩而立廬  
墓成墳旋踵而至陳振刻木為親秦玉伏棺滅火入  
夢而授紫蘇陳貞之孝感也始花而得三芟瞿興嗣  
之精誠也顧榮致書于鄉人后主制銘于宮舍季儒  
赴難於兄周彬振撫其弟非弘愛敬之理而能然乎  
亦有禱北辰而疾愈膳北土而得魚雕胡盡生於湖  
中霜橘嘗懷于賓座吳人以為美談亦足稱也若乃  
忠貞如張四山尤稱純孝雍睦若顧覲之獨秉忠義  
傳雖匪一義兼在三孝立則忠遂矣孝之大也不其  
然乎

贊曰脩途尋遠蒸蒸孝思顧我復我生之育之圖形  
畫像色悅聲怡循陟屺閭堅求醫祥禽瑞兔甘露  
靈芝消塵語孝河海稱慈荆葉匪瘁棣萼成詩姜李  
並駕曾閔同規

吳中人物志卷之二

長洲張景春甫輯

曾孫獻翼論贊

忠義

春秋

蹶由王餘祭之弟魯昭公五年楚伐吳蹶由犒師楚王執之將以繫鼓使問曰女卜來吉乎對曰吉寡君聞君將治兵於敝邑卜之以守龜曰余亟使人犒師請紆以觀王怒之疾徐而為之備尚克知之龜兆告吉曰克可知也君若驩焉好逆使臣滋敝邑休息而



忘其死亡無日矣今君奮馬震電馮怒虐執使臣將  
以釁鼓則吳知所備矣且吳社稷是小豈為一人使  
臣獲釁軍鼓而敝邑知備吉孰大焉乃弗殺以蹶由  
歸

要離吳人闔廬憚慶忌在隣國有萬人之力恐合諸  
侯以害吳伍子胥乃進要離要離進曰大王患慶忌  
乎臣能殺之臣詐以負罪出奔願王戮臣妻子斷臣  
右手慶忌必信臣王曰諾要離乃詐得罪出奔吳王  
乃取其妻焚棄於市要離乃奔諸侯以無罪聞於天  
下遂如衛見慶忌曰闔閭無道王子所知今戮吾妻

子焚之於市無罪見誅吳國之事吾知其情願因王  
子之勇闔閭可得也慶忌信其謀練士卒遂之吳將  
渡江於中流要離力微坐慶忌上風因風勢以矛鉤  
其冠順風而刺慶忌慶忌顧而揮之三摔其頭於水  
中乃加於膝上曰嘻天下之勇士也乃敢加兵於我  
左右欲殺之慶忌止之曰豈可一日而殺天下勇士  
二人哉可令還吳以旌其忠於是慶忌死要離渡江  
愍然不行謂從者曰殺吾妻子以事吾君非仁也為  
新君而殺故君之子非義也何面目以視天下之士  
言訖遂投身於江未絕從者出之要離乃自斷手足

伏劍而死

張胥鄙譚夫吾吳士也前交而後絕張胥鄙有罪拘將死譚夫吾命徒而取之至於道而後乃知其夫吾也輟行而辭曰義不同於子故前交而後絕吾聞之君子不為危易行今吾從子是安則肆志危則易行也與吾因子而生不若反拘而死闔閭聞之令使釋之張胥鄙曰吾義不同於譚夫吾故不受其任矣今吏以是出我以譚夫吾故免也吾庸遽受之乎遂觸牆而死譚夫吾聞之曰我仕而不受倅也不知而出之愚也倅不可以倅士愚不可以仕君吾行虛矣人

惡吾生吾亦耻以此立於世乃絕頸而死

王子地王孫彌庸皆夫差臣也魯哀公十三年越伐吳為二隊疇無餘謳陽自南方先及郊彌庸見姑蔑之旗曰吾父之旗也不可以見離而弗殺也太子友曰戰而不克將亡國請待之彌庸獲疇無餘地獲謳陽越子至復戰友與彌庸於姚皆死之

伍員字子胥自楚仕吳與謀國事實興吳國吳國強於天下員之力也及夫差信讒賜員以屬鏤盛以鴟夷而浮之江吳人憐之為立祠於江上

漢

彭脩字子陽會稽毗陵人也年十五時父為郡吏得  
休與脩俱歸道為盜所劫脩困迫乃拔刀前持盜帥  
曰父辱子死卿不顧死耶盜相謂曰此童子義士也  
不宜逼之遂辭謝而去鄉黨稱其名後仕郡為功曹  
時西部都尉宰黽行太守事以微過收吳縣獄吏將  
殺之主簿鍾離意多諫甚切黽怒使收縛意欲案之  
掾吏莫敢諫脩排閣直入曰昔任座面折文侯朱雲  
攀毀欄檻自非賢君焉得忠臣今慶明府為賢君主  
簿為忠臣黽遂原意罰貲獄吏罪後為吳令與太守  
俱出討賊賊交射之脩障扞太守為流矢所中死

下崇婁縣人漢桓帝時太守薛固為法吏所枉下廷尉崇與同郡烏程錢讓詣闕稱寃廷尉囚崇等以兵圍守苦毒持之崇讓恬然自若枉聲彌厲天子聞而奇之乃赦固罪

晉

朱桓吳郡吳人桓為將軍桓給事幕府後為濡須督魏使曹仁將步騎數萬向濡須欲襲取州土遣其子泰來攻城桓身自拒泰泰燒營而退卒後家無餘財桓賜鹽五千斛以周喪事

張禕吳郡吳人少有操行晉恭帝為琅琊王以禕為

人物志卷二  
卽中令及帝踐祚劉裕以禕帝之故吏素所親信封  
藥酒一甕付禕密令鳩帝禕既受命於道自飲而死  
齊

陸超之郡人齊江州刺史晉安王子懋防閭隆昌元  
年宣城公鸞既專廢立又殺鄱陽王錡隋郡王子隆  
等子懋欲起兵謂超之曰事成則宗廟獲安不成猶  
為義鬼鸞遣軍主裴叔業先襲尋陽遣將隨子懋參  
軍干琳之入齋害子懋琳之勸超之逃亡超之曰人  
皆有死此不足懼吾若逃亡非唯孤晉安之眷亦恐  
田橫客笑人端坐俟命王元龜嘉其節厚加殯歛

張冲字思約明帝時為郢州刺史梁武起兵手書喻意冲確然不回東昏遣使領兵及糧運送冲使拒西師梁武軍主曹京宗過江攻郢城冲固守不屈病將死厲府僚以誠節言終而卒

張嶷梁左僕射稷子方雅有志操侯景陷建鄴賊行臺劉神茂攻破義興遣使說嶷嶷斬其使仍遣軍破神茂景乃遣其中軍侯子鑒助神茂擊嶷嶷親出督戰城陷嶷釋戎服坐於廳事賊臨以白刃不屈執送景景將舍之嶷曰速死為幸乃斬之子弟遇害者十餘人景欲存其一子嶷曰吾一門已在鬼錄不就爾



處求恩於是皆死賊手

宋

葉夢得字少蘊蔡京在位多所變更夢得引周官太宰得以詔王而不得自專言甚剴切又極論士大夫朋黨專內重外輕之弊乞身先補郡力抗權貴

范成大字至能隆興再講和失定受書之禮假充金祈請國信使至燕山密草奏具言受書式進金主大駭左右將笏標起之成大屹不動竟全節而還

邊知章字公望歷永靜軍通判律學博士靖康初金人犯闕尋以和議退澶淵當孔道明年春告滿代者

避禍愆期虜將復動或勸知章逃去知章抵書平江諸弟以謂去歲兵至宜敵不敵今歲既盟宜和不和速禍必矣苟求幸逃豈不媿守邢匿詔事乎藉使非力所能而死當見吾祖地下無覩顏其冬虜至城下軍潰于內遂死之

朱良字良伯祖公綽光祿卿父季端為郎屢典名郡良仕秀州海鹽尉建炎四年金人犯順車駕南幸分兵入縣境良謂僚友曰今日乃忠臣義士死國之時也被甲執戈集射士百餘奮而前金兵數人死衆為披靡然力不敵竟死同郡時有武舉進士保義郎攷

為婺州永康尉賊衆犯州與兩浙兵馬鈐轄閻璋發  
州諸縣弓手將領馬珍俱被害

孫察臨之子朝議大夫載之從子也察以朝散郎奉  
使金國問上聖起居守節不屈金人裹以油絮焚之  
罵聲不絕而死

郭元邁字英遠應募奉使時達安魏行可假河北金  
人軍前通問使元邁為之副行次河朔以尺紙付家  
云去疆當藉棘時難保全生此身已許國矣至虜廷  
上書酋帥粘罕乞歸二聖金人留之不遣尚書洪皓  
北歸言其以身徇國弃之不取緩急何以使人元邁

不肯髣髴換冠卒于虜中

彌遜字似之累官起居郎以封事剴切貶知廬山縣  
宣和末知冀州金人犯河朔彌遜捐金帛致勇士脩  
城堞決河護塹邀擊其遊騎斬首甚衆兀朮北還戒  
師毋犯其城自被謫以來垂二十年及復居職論事  
鯁切如初秦檜再相獨彌遜與晏端復有憂色彌遜  
請對言金使請和欲行君臣之禮有大不可檜嘗邀  
彌遜至私第曰政府方虛員苟和好無異議當以兩  
地相澆咎曰彌遜受國厚恩何敢見利忘義今日之  
事獨有一去可報相公次日彌遜再䟽辭愈切直檜

大怒彌遜引疾上疏乞歸鄉里朝廷思其忠節

周虎字叔子靖康中徙居常熟為人倜儻輕財尚氣

慶元二年武舉進士授殿司步軍同正將除武學諭

閣門舍人充金國賀生辰接伴副使開禧二年知和

州時虜會諸道兵加渠帥以平南盪江等處長驅入

寇圍和州甚急虎部分將士棄城拒守其母何氏擁

孫息期與兒偕存亡虎謂父老曰吾國家守臣一朝

去此則為奔亡之人失節敗名生不如死效死弗去

雖歿猶生吾計決矣合戰凡三十四殺虜驍將以十

數最後射死其右帥石砮鏃虜引去於是和議堅決

而江淮安焉虎摧功歸毋進封永國太夫人故賞不  
及虎州人德之生為母子立祠

滕茂實元發從子也金人入寇茂實假工部侍郎出  
使河東割地太原陷黏罕將收為用遂寘代州使茂  
實易戎服又驅巾幘稍高者數人至前殺之茂實弗  
動自為哀詞復篆宋工部侍郎滕茂實墓九字密授  
其友董誥屬以後事欽宗過代州茂實具衣冠迎謁  
拜伏號慟請從舊臣俱行金人不許其後竟卒

王玠字介玉倜儻負氣節酒酣嘗舞劍為樂孔彥舟  
為舒蘄鎮撫使厚禮聘玠奏為幕屬初權邦彥知東

平彥舟隸麾下因事叛去及聞邦彥簽書樞密心不自安又宣州韓世清伏誅及韓世忠自湖外破劉忠俘馬友順流東下彥舟疑其圖已遂有異志問計於玠玠正色荅之曰總管被命鎮撫二州任優祿厚豈可負朝廷自陷不義諭以順逆凡數百言彥舟怒囚之越數日復問之玠曰君不能與韓公爭先立功以報君父顧乃甘心與逆賊為比而慮其見圖苟欲富貴能建大勲於國家則可何獨比虜能富貴人哉君誠欲反幸先殺我孰謂王玠而從賊耶彥舟竟沉玠於龍眼磯與妻子俱死玠嘗有讀楚詞詩意以原自

况

姚舜元字景瑞少拳勇以武功為保義即平江府東南副將守吳淞德祐改元冬元帥下平江時姚氏為邑巨族民樂歸附舜元語弟舜賓及舜賓子應龍曰國家德澤在人大本未去收合散亡以應內援外事可圖也未幾元帥偏將東狗會黃霧四塞襲兵猝至舜元無備與弟舜賓姪應龍及次子興龍俱死之

元

孟文龍字震翁孟子之後昭慈后五世孫中銓試授迪功郎自咸淳以來被命主昭慈祀事元兵下江南



平章史弼欲薦起之文龍致書以死辭乃止自是不  
出戶庭以讀易終身

楊椿吳人少尚節義元末叅政脫寅辟為叅謀守婺  
門張兵至衆皆潰椿獨擐甲持弓匹馬突出刼之身  
被數鎗死

陳謙吳人善詩賦至正十六年兄訓為江浙行省幕  
官還家視弟俄遇兵亂入室被斫謙以身蔽并遇害  
國朝

劉政字仲理蘇人父以禮學識淹博洪武初薦授沛  
縣教諭公從宦得肆力問學革除已外以春秋中應

天府鄉試第一時國家多難試題出可以託六尺之孤一章考官侍講方孝孺為時儒宗得其文驚曰此他日臨大節而不可奪者批之有群鳥中之孤鳳乃吾當虛左以處之之語公平生忠義自許壬午歲聞國事感慨不食死

黃鉞字叔揚蘇州常熟人以生負除宜章典史洪武二十二年己卯舉湖廣鄉試明年庚辰第進士授刑科給事中封駁甚多卒己即建文三年以父喪歸其所厚翰林侍讀方孝孺弔之屏左右密言曰北方不靖蘇常鎮京師之左輔應北之右臂也君吳人朝廷

之近臣今雖去當有以教我鉞曰三郡惟鎮江最為  
要害守非其人是撤垣以納盜也童俊狡獪不宜獨  
守任吾近見其奏事上前視遠而言游此其心不可  
測也蘇州知府姚善忠義激烈有國士風必能獨當  
一面但仁慈有餘而御下太寬此治郡之良才恐不  
足於定亂耳然國家大勢不在江南必待戎馬至此  
亦已晚矣孝孺乃因鉞附書於善以忠孝相勉期戮  
力王室以濟時艱危善得書與鉞相對慟哭以死自  
誓鉞至家因父殯在陂上舊廬即往居之足跡不入  
城邑壬午靖難師起日促姚善受達文君摠詔率蘇

松常鎮嘉興五郡兵馬勤王善以書招鉞鉞以親喪尚在殯請即日營葬畢事乃可趨命既而童俊果以鎮江降 文皇帝正位詔暴姚善罪狀收之善麾下許百戶性權詐因得親善縛善邀賞鉞聞之慟哭遂絕食閉目三四日死以家人救甦或傳言款服 上赦其罪復瞠目曰吾知善為人決無二心吾且少俟之善事定吾獨死未晚也脫果不死吾將下報希直希直者孝孺字也遂復稍稍食其年七月十日善就刑報至鉞起登琴川槁西向再拜祠而哭之曰吾與君同受國恩不幸有國難義同許身君與希直同死

國吾忍背義獨生乎祠畢詒家人婦祭具遂從容整衣冠奮身入水死

范純字誠夫成化初勅食四川風裁肅然時松茂有警純督運抵威州寇來攻城以計破之再轉松潘時萬安居內閣其子驕橫純以法繩之故官久不遷又有當道市珍禽以充貢每衛索金至數百兩純白止之弗聽嘆曰吾不能為民庇可復仕乎即移疾歸

楊瑛字潤卿嘉定人弘治初為給事中上疏請革弊政以保初治嘗夜出遇貴璫爭道不恭批其頰璫泣訴於上上云知是長楊何不讓之其受眷注如此

龔弘字元之嘉定人知兗州縣吏有貪污不法者聞風輒解印綬去闔郡屏息時中貴李興過兗州聲勢張甚弘獨長揖不屈後有一巨璫縱奴殃民弘擒其首惡六十三人置之於法

李應禎字貞伯一名姓其先汴人建業南渡寓居蘇之長洲遂家焉祖士文永樂中以名醫薦入太醫院應禎與弟應祥同生於南京景泰中以儒士中應天鄉試卒業太學時中貴人牛玉用事士爭出門下玉雅聞公欲延致之一日詣太學公避不與見頃之拜中書舍人故事賜百官燕中書舍人坐給事中御

史。上。頃。歲。禮。部。大。臣。輒。易。其。次。公。抗。章。斥。其。非。至。再。  
語。侵。大。臣。大。臣。竟。持。其。議。既。而。不。樂。與。同。舍。之。倖。進。  
者。俱。乞。補。教。官。不。許。尋。召。直。文。華。殿。時。荆。襄。流。民。定。  
居。既。久。言。者。欲。逐。之。公。上。言。宜。就。撫。其。衆。逐。之。非。便。  
朝。迂。是。其。言。命。有。司。縣。其。地。壬。辰。詔。罵。浮。屠。書。公。辭。  
非。臣。職。上。章。極。論。其。非。是。忤。旨。迂。杖。之。幾。死。久。之。罷。  
駿。直。

論曰忠正為人臣之本功雖不成志節可紀故天下  
至大方身則小生為重矣比義則輕然則隕節苟全  
其宜義夫豈吝其沒捐軀若得其所烈士何愛其存

曰忠曰良時則為之豈因願與不願也觀張禔自煬  
以全帝張嶷嘗賊以滅宗孫察見焚于油絮王玠竟  
沉於龍磯朱良知死國之時元邁抱奉使之節當援  
攘之際踐必死之機豈昧夫天之所廢哉猶甘心茹  
醢赴義若渴者內懷鐵石之心外負凌霜之節豫讓  
所謂媿後世之人臣而懷二心者也若張胥鄙之于  
友生卞崇之於牧守義重在三報隆知已蹈節輕生  
之士無乏于時可謂歲寒貞柏疾風勁草矣千載之  
後懔懔如生用旌吳之有人焉

贊曰歲暮貞心嚴風勁節實惟有吳忠貞若綴璽鼓



身全觀兵目挾功推聖善旗逢姑蔑鬼錄一門荒途  
九折橫客並驅原心一轍確殉單誠千載不滅

吳中人物志卷之二

吳中人物志卷之三

長洲張景春甫輯

曾孫獻翼異論贊

吏治

漢

陸烈字伯元漢高帝時為吳令遷豫章都尉卒吳人思之迎葬于胥屏亭遂為吳人

任延字長孫南陽宛人也十二為諸生學於長安顯名太學號為任聖童更始元年拜會稽都尉時年十九迎官驚其壯壯少也及到靜泊無為唯先遣饋禮祠

延陵季子時天下新定道路未通避亂江南者皆未  
還中土會稽頗稱多士延到皆聘請高行如董子儀  
嚴子陵等敬待以師友之禮掾吏貧者輒分奉祿以  
賑給之省諸卒令耕公田以周窮急每時行縣輒使  
慰勉孝子就餐飯

第五倫字伯魚京兆長陵人拜會稽太守雖為二千  
石躬自斬芻養馬妻執炊爨受俸裁留一月糧餘皆  
賤賣與民之貧羸者會稽俗多淫祀好卜筮民常以  
牛祭神百姓財產以之困匱其自食牛肉而不以薦  
祠者發病且死為牛鳴前後郡將莫敢禁倫移書屬

縣曉告百姓其巫祝有依託鬼神詐怖愚民皆案論之有妄屠牛者吏輒行罰百姓以安永平五年坐法徵老少攀車扣馬號呼相隨日裁行數里倫乃偽止亭舍陰乘船去及詣廷尉吏民上書守闕者千餘人張霸字伯饒蜀郡成都人鄉人號為張曾子永元中為會稽太守表用郡人處士顧奉公孫松等並有名稱其餘有業行者皆見擢用郡中爭厲志節習經者以千數道路但聞誦聲越賊未解郡界不寧霸始到遂束手歸附不煩士卒之力

元賓以孝廉入三省除蒼龍司馬衛尉察尤異遷吳

令視事二稔民用寧康辟州從事召拜議郎延熹二年卒

三國

滕胤仕吳為吳郡太守以善政見稱常日接賓客夜省文書或通曉不寐

顧雍字元歎少從蔡邕學琴書嘗仕吳為婁長有治蹟後遷會稽郡丞吏民婦服孫權敬之親拜雍母於庭官至丞相封醴陵侯

晉

荀羨以建威將軍為吳國內史有能名

鄧攸吳郡太守載米之郡俸祿無所受惟飲吳水而已郡中大饑輒開倉賑貸刑政清明百姓歡悅後稱疾去職百姓留牽攸船乃夜中發去吳人歌之曰統如打五鼓鷄鳴天欲曙鄧侯挽不留謝人推不去賀循元帝為安東將軍以循為吳國內史

顏含吳郡太守所歷簡而有恩明而能斷王尊嘆曰顏公在事吳人歛手矣

應詹元帝推重其才出補吳國內史

蔡謨蘇峻搆逆吳國內史庾冰出奔乃以謨為吳國內史謨與張闓等共起義兵迎冰還郡

素崧吳郡太守博學有文孫恩作亂崧守淞濱城陷  
死之

宋

何子平廬江潯人也世居會稽少有志行事母至孝  
揚州辟從事史元嘉末除令海虞祿俸悉以供母不  
以及妻子母喪去官哀毀踰禮幼持操檢敦厲名行  
雖處閭室如接大賓學堅義明處之以默安貧守善  
不求榮進士彌以此貴之

顧脩期義熙中為吳令時縣西鄉有柿樹合本殊條  
羊玄保吳郡太守廡素寡欲為政雖無殊績而去後

常必見思南史云人仕宦非惟須才然亦須運命無  
有好官缺未嘗不憶羊玄保

齊

傅翮吳縣令發姦擿伏惠化如神嘗言為政惟勤而  
清清則吏不能欺勤則事無不理

張環吳郡太守時環已封侯既有國秩不取郡俸高  
帝敕上庫別藏其俸以表其清

何敬容梁天監中吳郡太守勤恤民隱辨訟如神視  
事四年政為天下第一

謝舉吳郡太守先是何敬容居郡有美績及舉為政



聲績相似

周洽汝南人歷吳令廉約無私齊武帝時卒於都水使者無以殯歛吏人為買棺器

梁

陸慶少好學通五經尤好左氏春秋節操高介為婁令有善政

唐

劉太真字仲適其先自彭城徙居金陵弱冠以行義脩潔詞藻瑰異為蕭穎士所知廣德二年江淮宣慰使李季卿薦授左衛兵曹浙江觀察使李懷筠聞其

名表為常熟令到官未暮而邑人化之後歷官禮部  
侍郎出為信州刺史移疾去郡卒

韋應物白居易劉禹錫皆蘇州刺史應物貞元初在  
郡暇日惟焚香哦詩自娛風流雅韻播於吳中居易  
自杭州移刺蘇州作虎丘路在郡有政績多題詠禹  
錫在郡以政績最賜金紫服

李栖筠蘇州刺史時許杲有窺江南意栖筠乃張武  
備厚賚金帛勞杲軍杲懼悉衆渡江

王仲舒蘇州刺史隄松江為路變瓦屋以絕火災賦  
調常與民為期不擾自辦政為天下最

皮日休吳郡從事與郡中名士陸龜蒙等唱和賦詩  
名曰松陵集自為序

劉綺莊崑山尉研窮古今博考傳記作類書一百卷  
號崑山編

狄兼謨文宗時蘇州刺史治有最績

岑仲翔宰相文本之孫其先鄧州南陽人漢末自江  
夏徙吳郡後遷鹽官仲翔為長洲令時兄羲為金壇  
令弟仲休為溧水令皆有治績宰相宗楚客語本道  
巡察御史曰毋遺江東三岑楚客薦羲為記水令仲  
翔歷太子中允陝州刺史封博望公

滕遂貞元二十一年舉明經及第又書判登科歷大理評事長洲令攝吳縣時人歌曰朝判長洲暮判吳道不拾遺人不孤人謂有漢叔輔之遺風改侍御史供奉賜緋

宋

張達明嘉泰中任政平訟理有循良風作無訟堂公暇從容與客論詩曰詩真難於絕句絕句尤真難於五言欲其章短而意長辭約而理盡實難其才故其留題邑中者若松陵漁具諸作皆人所真及後仕至右丞

趙彥貞宗室子用會稽籍舉進士授宣教即知吳縣  
時營思陵轉運司調取洞庭清石期會迫彥貞即  
日凌湖至其地召工泣諭之民感動趣役先期告畢  
秩滿通判袁州

馬尋字子正鄆州人祥符初以明經登進士授吳江  
簿出京日兄彛戒之曰到任半載可誦律書為治民  
之本到官後彛至縣詰之答曰縣衝要疲於送迎未  
暇及也彛不懌者久之尋乞緩期諷之至冬果精律  
學尋登朝籍久叅法寺有平允之譽累著治聲彛之  
力也

張方平字安道揚州人景祐中為崑山令縣有數十年積訟一問而決知州蔣堂得其所著芻蕘論上之遂舉賢良方正直言極諫科熙寧初拜叅知政事以太子太保致仕

趙彥櫚字文長秦悼王七世孫父訓之以死事贈直秘閣彥櫚舉進士為崑山主簿後知平江郡時海盜出沒為患彥櫚奏分崑山之半置嘉定縣屯兵以守以寶謨閣待制致仕

李維字仲方肥鄉人宰相沆之弟舉進士為崑山令至道三年縣獲白龜維獻之郡官至尚書左丞

浦宗孟蘇州推官英宗以水災求直言宗孟謂臣陰  
象婦女陰類兵陰物閹宦陰之餘姦臣陰之極佞邪  
陰之本四夷中國之陰雨僚之變殆為是七者上疏  
極言之

林肇熙寧中知吳江縣覽江湖之勝慨然有歸思乃  
即松陵勝處作鱸鄉亭繪三高像於亭中遂具舟拂  
衣而歸

洪彥昇常熟尉奉母之官既至前尉欲申期三月以  
規薦而中分俸入彥昇處僧舍却俸不納如期始交  
印

向子諲知平江府金使議和將入境子諲不肯拜金  
詔上章言自古屈已和我未聞甚於此時宜却勿受  
忤秦檜意乃致仕

張孝祥知平江府判決如流庭無滯訟屬邑大姓為  
奸利孝祥捕治籍其家得穀粟數萬明年吳中大饑  
迄賴以濟

李衡吳江主簿有部使者怙勢作威侵刻下民衡不  
忍以敲扑迎合投劾於府拂衣而歸

袁韶吳江丞提舉常平黃桷檄韶覆田以定役蘇師  
旦恃韓侂冑威福密諭意言吳江多姻黨儻相容當



薦為京朝官韶不聽

王佐知平江府政聲第一尤長於聽訟時嚴酒禁有鄭氏以母病湏酒飲藥民告其藏酒逮捕佐曰此必由家人漏言驗之果然得其姦狀而杖之

孫子秀吳江主簿日詣學官與諸生討論義理有妖人稱水仙太保郡守王遂將使治之莫敢行子秀往焚其廬碎其像沉其人於太湖曰實汝水仙之名矣妖遂絕

包恢知平江府首以所得供堂緡錢盡償供帳之費節省逋課以補九任度支逋欠去官之日府庫剩錢

六百餘萬

黃震吳縣尉縣多豪勢家告私債則以屬尉民多飢寒窘苦震不受債家告府檄攝其縣及攝長洲皆有聲

韓正彥字師德相州安陽人宰相琦從子父璩正彥嘉祐中知崑山縣濬塘七十里達于郡得膏腴田數百頃民賴之比去民遮留不獲為立生祠作思韓記

劉石祠下

韓彥古知平江府至郡有士人持吏短長投狀以占能否彥古曰此狀汝不能為必有吏人為者其人錯

愕即以實告於是捕吏杖之一郡以為神明

梁澤民南劍州將樂人政和中為峴山令有惠愛父伯臣來就養澤民得於庭教為多

謝深甫字子肅台州臨海人軋道二年進士由嵯縣尉調崑山丞嘗為浙漕考官一時士望皆在選中寧宗朝拜右丞理宗朝孫女為后追封魯王謚惠正

常懋元祐七年進士由婺州推官改知嘉定縣事清慎自持不畏強禦歲大飢勸分和糴按籍均敷民受其惠部使者交薦於朝後知平江府事政績在郡志

中

項公澤字德潤温州永嘉人淳祐間由長洲丞辟宰  
崑山縣為政廉敏以文學飾吏事留意學校買田養  
士官至宗正丞中奉大夫嘗脩玉峯志

元

姜復昌嘉興人宋都統才之孫也泰定初來為判官  
廉而才時律助法行與省官覈產程役審諦平愜寬  
免單窶氣容溫舒而遇事執直長官橫悍詞色為屈  
放免小民里正百餘州人稱頌秩滿當去民將原為  
餽贐復昌抵夜潛往咸嗟悵而退

任立知嘉定時寬厚明達廉正不阿嘗釋冤獄四十

九人歲侵全活飢民六千餘戶

王都中平江路治中時年甫十七僚吏見其年少頗易視之都中遇事剖析動中肯綮皆瞞胎不敢欺學舍久壞都中募大家合錢新其禮殿

達魯花赤月里海牙奉訓蒙古人皇慶間兩淮運司簽撥竈丁檄公親往運使臨之甚嚴公昌言曰吾州鼎立海心民鮮而貧不堪其事寧斷吾臂弗敢撥也雖繩之以法而公辭色愈厲終以其一心有愛民而遂聽之民受其賜時歲旱公齋宿於寶慶觀而禱焉其室人病亟翌日家人來告曰夫人已死公曰我為

民禱雨未獲孚應汝等自歛之吾不可歸也誠懷愈切未幾雨大霑濡去民爲立去思碑沒于海

王立中由慈溪縣尉遷嘉定知州再遷松江知府所至以廉靜稱博學善屬文有息齋寓齋等集

山山武毅蒙古人至元七年秋八月海中多寇市井艱糴民不聊生公奮然曰我來長此土治此民期與斯民同樂爾今海寇病民此我責也即統捕盜司及水巡官兵分坐哨船出海勦捕市人從者殆百人遇賊于海公鼓衆而前自午至酉賊勢潰殺傷莫知其數還其所劫人船公誓于衆曰厥要全獲醜類以清

海宇敢有不前予即戮汝時日晚不能進公復率衆船圍守欲大戰夜半風雨驟作賊黨昏遁去州境賴以寧謐至今咸頌其德云

國朝

羅永年字延齡順天宛平人宣德中來知崑山縣事為政不弛不拘民賴之以安境內馬鞍山童捐俸買柏徧植于上歲久鬱茂人呼為郎官柏縉紳多為詩美之

洪冕成都人知嘉定縣老政練達一遵前令之遺政縣嘗有火災冕顙天叩頭火尋滅

吳復閩縣人由吏員任崑山縣主簿九年知府況鍾知其能奏授知縣事滿考三載轉知栢鄉縣陞工部主事侍郎周忱來巡撫辟為屬官歷陞本部侍郎加陞尚書卒

龍晉字遵叙吉水人知嘉定縣甫下車辯累年不決之冤獄寬各驛科擾之馬役民甚德之吳淞江及鹽鐵塘淤塞躬督夫役浚而通之初入浚吳淞江嘗獲一石刻其文曰得一龍江水通人皆歎異以為事之前定

葉錫字玄圭永嘉人以進士入翰林為庶吉士元年



出知吳江縣以母喪去四年改知吳縣專尚德化寒暑布袍十年朝京師以治行卓越稱

吳哲字克明知嘉定縣事以六事作箴置諸座右時久旱哲為文禱雨雨隨至海濱有小蟹嚙稼復為文以責海神一夕徙去民遠者適市貿易必竟日而返哲度其地之中為市民德之號吳公市

王興宗洪武初為蘇州知府器量宏廓更卒有過諭之使愧赧既改又獎勸之人皆感德不敢犯法

李亨蘇州知府性簡重臨事不迫薄於自奉治民有方不以喜怒加賞罰

湯德蘇州知府剛介有為不屈於勢利崇教化明法令鋤奸去暴豪猾改行聽訟詳審獄無冤抑

魏觀洪武間為蘇州知府深懲陳寧苛酷之弊一以寬厚為政明教化正風俗郡中翕然

鄭珏吳縣知縣廉謹有能政平訟理吏畏民服卓然可稱

芮翀崑山知縣正直有局幹政不察察未嘗失民情劾暴繩頑扶顛舒困囹圄為之空虛去任民流涕不舍

柳敬中知常熟縣脩整學校勸士進業疏浚河渠便

民生理以嚴馭吏以公均賦政聲翕然

劉幹永樂初為長洲縣丞廉介剛直門無私謁衣簾食糲九年不變滿去民擁道哭送後以百姓請留仍為丞卒於官貧不能喪民為具棺歛送歸

馬文炯為崑山知縣剛介有為政令嚴明姦孽屏跡民物熙洽疾卒民思慕之若其所生

論曰吏治難言哉吳王時高高下下以罷民於姑蘇越大夫將還玩吳國於股掌之上未有起百姓以為百姓者也漢置守令丞尉以賢良薦舉孝廉明經自進多途不限甲乙治行若趙廣漢尹翁歸張敞王尊

皆起于獄吏書佐故明牧嘉吏惟漢為盛所居民富  
所去見思廩廩庶幾德讓君子之遺風焉然皆以經  
術緣飾吏事未有不達于學而能官者也 明興不  
限科制如况守拔于掾吏天下以為才卿吏師九牧  
之人所共稱嘆與廣漢翁歸諸君子相埒雖鳳皇甘  
露之祥靈芝黃龍之應未足奇也學苟顯名即聖童  
如任延何必減已老之顏駟哉陸烈元賓而下仲翔  
兼友于之美澤民得庭教為多寬惠之音足以傳于  
來葉斯其績用之最章章者耶後代科專甲乙藝止  
濫竽苟非入第雖復人才可施每為清途所隔養馬

不暇東門與之誼所以作也今所綴集殊聞顯迹類  
非淺才陋學之士異吏吾土者企高山而仰止聞清  
風而自勵云

贊曰理善致祥政畏張急譬烹於鮮猶工于埴長吏  
親人希經邦邑吳水獨嘗清原斯挹貪氓洗鏡汚吏  
澄革瘼蠲匹夫絃鳴千室秋月春風何徃非適事類  
龔黃化比蒲宓嘉此循良操彼風迹期播德音後代  
永式

吳中人物志卷之三